

欽定剿平粵匪方略

欽定勦平粵匪方略卷一百八十二 丁巳年

九月初二日

庚辰

駱秉章奏言按察使銜記名道

王鑫經

臣

調赴江西勦賊疊獲全勝駐軍崇仁

縣之鳳岡墟以溽暑遘征陡患瘡痍而軍士數
月苦戰屍氣薰蒸疾多不起其留駐永豐縣城
者卽選同知張運蘭督之七月十四日探報吉
安府城僞檢點傅忠信率賊萬餘至吉水縣城

道先鋒賊僞將軍何姓率賊二三千將窺永豐
縣張運蘭會同代理永豐縣知縣章激等督勇
迎勦斬擒二百餘名十六日傳逆由烏江來撲
張運蘭等復於城外野壘橋敗之斬擒一千二
百餘名王鑫以賊勢尚張派都司銜守備朱惟
堂赴永豐助勦適臣所調同知王勳訓導胡兼
善帶勇繼至二十五日探報傳逆屯踞坪山王

勳令黃萬友朱惟堂由小路先抄賊後而自率
親勇嚴陣待之賊衆排隊出抗官軍屹立不動
相持間奇兵左右衝出斬賊六七百追至雙源
鋪烏江等處共斃賊千餘是日王鑫在鳳岡墟
接署知縣靳丹書稟報知賊擾近公陂墟料其
將竄樂安而靳丹書所部太單時已病莫能興
力疾趨援二十六日抵浯漳探報二十五日斬

丹書已擊賊陣亡賊聞王鑫大隊掩至仍由公
陂退竄崇仁縣境王鑫移師入樂安縣城而瘡
痍未減肝氣復動漸臻危篤竟於八月初四日
病故臣當飭同知張運蘭知縣王開化督其全
軍分起管帶並札令該道之兄王勳暫攝理全
軍事務俟道路稍通王勳卽護喪歸楚以妥忠
魂臣維已故按察使銜候補道王鑫本湘鄉縣

文生自咸豐二年賊犯長沙卽在籍辦理團練
與其師已故浙江甯紹台道羅澤南以忠義激
其鄉人講求束伍選士之法湘勇軍律之精實
基於此自札委帶勇以來剿除衡永郴桂各屬
土匪捍禦兩粵會匪援剿江鄂賊匪身經數百
戰前後殺賊不下十餘萬克復城池二十餘而
所將之勇丁少僅數百多亦不過數千紀律嚴

明所向有功所著練勇芻言陣法新編練勇臆
說尺一偶存各書皆可見諸行事該道自蒙

天恩由諸生洊擢今職刻思圖效涓埃忠愛之忱矢諸
寤寐其父王宗麓常加訓勉屬無以親老爲念
該員日在行閒亦未敢乞假歸省該員年甫三
十有三方謂報

國養親爲日正長不料以勞瘁悲憤遽殞其生也

合無仰懇

天恩逾格將該員晉贈布政使銜照二品例從優議卹
並

特予諡法以獎賢勞湖南江西建立專祠以彰戰蹟並
請

賞給該員父母二品封典以爲教忠者勸奏入

上諭內閣曰按察使銜候補道王鑫由湖南生員帶勇

勦除衛永郴桂各屬土匪兩粵會匪並越境進勦湖北江西逆匪紀律嚴明身經數百戰前後殺賊十餘萬克復城池二十餘處厥功甚偉茲以勞疾歿於軍中深堪憫惜著加恩晉贈布政使銜卽照二品例從優議卹並准其子諡仍於湖南江西地方建立專祠該故員父母賞給二品封典以獎勳勤而褒忠義

駱秉章又奏言王鑫一軍屢次大捷業經江西

撫臣耆齡奏請保獎自應聽候覈明辦理惟查
卽選同知張運蘭同知銜王開化兩員在王鑫
軍中最久自援剿江西以來奮勇當先屢獲大
勝本係應保之員茲旣委帶該道舊部職分較
小難期鎮壓應請

旨先將卽選同知張運蘭以知府卽選並

賞加道銜同知銜王開化以知府卽選出自

天恩其餘出力文武各員仍由江西撫臣彙保奏入

上諭內閣曰卽選同知張運蘭同知銜王開化隨同王
鑫援勦江西甚屬得力張運蘭著以知府卽選並賞
加道銜王開化著以知府卽選所有王鑫原帶各勇
卽著該二員分帶進勦其餘在事出力員弁兵勇著
著齡覈明彙案保奏

初五日

癸未

德興阿翁同書奏言陸路總兵安勇

羅玉斌總管台斐音保會同水師總兵周希濂
等於八月十九日進攻九洲適南岸下關一
帶有賊船三十餘隻揚帆北渡周希濂卽派遊
擊王之敬由北岸進攻九洲世職龔保康等
由南岸進勦七里洲而自率遊擊楊冠春等由
中路直搗下關該逆望見我師開礮抗拒獲其
北渡之船我軍一鼓作氣分艘傍岸轟塌九洲

洲賊營望樓兩座並七里洲賊隄蔽斃賊匪十餘名該逆見勢不敵轉帆竄回南岸方水軍酣戰之際安勇派遊擊魁霖等分兵三路進攻行近九洲洲率兵數十人直前挑戰該逆梟水出巢拒敵適都司洪祿等由新河口進攻亦梟水抄戰擊斃賊目二名轟斃數十名焚燬賊卡五座江浦之賊前來接應台斐音保等設伏截擊

安勇羅玉斌帶隊由陳擺渡進兵會合始將江浦之賊擊退二十一日安勇羅玉斌台斐音保分帶兵勇進攻江浦縣城中途燬賊卡六座迨抵賊壘忽見城北小水門出賊三四百名欲截我兵歸路經魁霖等合兵兜剿賊勢不支仍由小水門竄入兵勇且追且擊直抵城下約斃賊數十名該逆由南門竄出四五百名我軍開礮

迎擊賊衆披靡台斐音保率馬隊涉淺斷其歸
路賊匪大敗奔回城內約斃賊七八十名至瓜
州賊匪連營阻水意圖死拒臣等督飭總兵鞠
殿華等約會土橋水師於二十二二十一等日護
運大礮至四里鋪向賊壘轟擊而焦山水師總
兵泊承陞陳世忠亦於二十二日各駕師船赴
瓜州新河口及七號口一帶直對賊隄開放大

嚴該逆伏匿不出臣德興阿復親督各隊於二十四五兩日如前進攻擊斃賊匪數十名內有執大黃旗賊目二名轟倒礮臺一座望樓一座該逆始終不敢出拒目下秋禾成熟一律登場野無所掠賊匪已成坐困瞬屆霜降宿潦漸收我兵差易進攻惟有激勵諸軍枕戈蓐食以冀早就肅清

德興阿翁同書又奏言查金陵逆匪以瓜鎮窮
蹙先令上游賊眾搶掠民船派賊二千護運糧
米於八月十二日由金柱關開出大江接濟瓜
鎮曾經知縣楊承忠稟報而此股賊艘未見下
竄想卽係十九日浦江擊退之船該逆見江面
不能下竄始改計由南岸赴援此時南軍兵力
甚厚諒能截其來路萬一乘隙北渡臣等卽飭

聞

下游舟師及陸路各營一體防勦奏入均報

同日張芾奏言婺源一縣界連江西浙江在徽州西南二百四十里相距稍遠徽防兵力不敷分派是以浙江撫臣議由衢州撥兵三千前往扼守並令臣撥兵出紮婺源北六十里之清華街臣卽與江長貴派參將王夢麟統帶兵勇一千

二百人在清華街紮營三座而屬浙軍駐紮葵西四十里之中雲河以禦賊來路且與清華之軍相爲犄角乃總兵饒廷選委遊擊楊國正來相度地勢謂中雲不可紮營宜守葵城臣與江長貴力爭不可晏端書卒從楊國正之議饒廷選旋將楊國正調回而派知府畢大鈺遊擊楊金榜等管帶楚勇浙兵二千數百人於葵源城

外分紮數營且有在東門外者似係豫爲退步
七月初二日有賊自樂平來畢大鈺楊金榜等
隊至中雲迎擊小挫初六日賊偪婺城楊金榜
等遽棄營走畢大鈺力竭陣亡向使中雲紮營
何至任賊直入且使楊金榜等固守婺城則清
華街一軍亦當赴援今乃片刻不守以致縣城
失陷遺棄軍火器械餉銀皆爲賊有而畢大鈺

以文員死綏被害甚烈是則楊國正倡議貽誤
於前楊金榜棄軍潰敗於後情節雖有輕重均
爲法所難宥也自浙軍退後賊踞婺城清華一
軍之勢甚孤且休甯各嶺處處可以竄越臣與
江長貴於無可抽撥之中設法布置復派隊三
百出嶺策應賊四次來犯均經王夢麟等迎擊
獲勝維時石埭祁門警報沓至臣疊次函致晏

端書饒廷選速飭楊國正等進兵會勦迄今月
餘楊國正始帶兵到德興縣屬新建鎮駐紮查
浙江來文楊國正共帶兵勇三千數百人乃昨
閱該員致婺源縣信云尙須稟請上司添兵卽
便移營又稱擬於中秋夜出其不意不減元宵
奪崑崙之功等語以軍事視同兒戲不知是何
肺腑臣屢請晏端書將楊國正楊金榜等分別

參處未見施行現攻剽喫緊之際若不擇尤懲處則衆情觀望罔知儆畏難望有功應請

旨嚴行查究以伸軍法而肅戎行奏入

上命軍機大臣傳諭晏端書曰本日據張芾奏稱晏端書議由衢州撥兵扼守婺源總兵饒廷選委遊擊楊國正相度地勢謂中雲不可紮營宜守婺城張芾與江長貴力爭晏端書卒從楊國正之議饒廷選旋派

知府畢大鈺遊擊楊金榜帶兵分紮城外竟似豫爲
退步追賊偏葵城楊金榜等棄營而走以致縣城失
陷楊國正現駐德興縣屬新建鎮觀望遷延等語楊
國正曾經何桂清奏賞勇號並據晏端書奏稱該員
久列戎行令其統帶在防官兵而僨事若此楊金榜
於七月中棄營逃走而晏端書稱其潰圍而出身受
重傷情節亦迥不相符張芾近在徽州見聞較確該

撫遠在浙省恐該員等捏詞稟報受其朦蔽著晏端書按照所奏確切查明如婺源失守實係楊國正貽誤事機今復擁兵不進卽將該遊擊撤回嚴叅懲辦並另派得力之員前往管帶兵勇不得因保奏在前心存回護自干重咎楊金榜是否受傷抑係棄城逃避著一併查明叅奏按律懲辦以伸軍法可儆效尤張芾又奏言青陽石埭交界之崇覺寺地方爲

徽甯緊要門戶今年二月提臣鄧紹良派副將
蕭知音帶兵勇二千數百人駐守適有賊由石
埭西鄉入犯霧露嶺蕭知音派隊往禦帶勇官
劉福林首先敗逃蕭知音卽率隊退駐涇縣之
章村賊遂陷石埭縣城若非太平縣知縣楊裕
仁傳集民團力扼三折嶺臣連夜趕調援兵則
賊乘虛竄入而徽郡危矣乃鄧紹良來文猶謂

蕭知音之退不爲無見蕭知音旋在孝思嶺接
仗挫敗捏報殺賊二百復由章村退往涇縣三
月周天受克復石埭鄧紹良派副將蔣錫光移
紮崇覺寺蔣錫光輒以崇覺寺四面受敵斷不
可守爲辭其倡言阻撓實皆由於畏葸五月鄧
紹良復派蔣錫光與守備馬雲龍帶勇二隊到
石埭歸周天受調遣旋又調回涇縣當經周天

受以大通有賊竊伺請飭蔣錫光回涇暫留馬
雲龍一隊以備堵剿詎馬雲龍與各勇聞警紛
紛潰去周天受稟請晏端書鄧紹良究辦未聞
稍予懲創七月涇縣萬級嶺有賊竄擾守備吳
正熙因兵單力竭僅以身免總兵秦如虎竟不
接應輒退回涇城賊入嶺大掠經吳正熙集團
擊退涇太之人莫不感吳正熙而怨秦如虎可

見公道自在人心也以上各事 臣身在行間見
聞較近實不忍坐視貽誤應請

皇上將饋事各員置之於法庶軍中咸知儆惕奮發圖
功奏入

上命軍機大臣傳諭何桂清曰據張芾奏稱二月間副
將蕭知音駐守崇覺寺適賊犯霧露嶺帶勇官劉福
林先逃該副將遽行退往章村旋在孝思嶺挫敗捏

報殺賊嗣因周天受克復石埭經鄧紹良派副將蔣錫光移紮崇覺寺該副將以不可守爲辭心存畏葸五月閒周天受以大通有賊窺伺留守備馬雲龍堵勦亦聞警潰逃七月賊擾萬級嶺總兵秦如虎退回涇城致令該逆入嶺大掠以上各情張芾近在徽州見聞確切何以鄧紹良未聞咨報懸辦恐該提督駐軍較遠誤信蕭知音等詳報之詞致受欺朦抑或因

該總兵副將等皆其派往心存徇庇當此賊氛未息
豈可博寬厚之名致失律將弁毫無儆畏著何桂清
按照所奏情節據實查叅似此節節退縮或聞警先
逃並敢以敗仗捏報殺賊卽立置重典亦屬罪所應
得毋稍姑容

十三日 辛卯 李孟羣奏言 臣 駐軍蘇家埠該處有

河一道遊擊盧又熊等紮營河東必須搭造浮

橋接運糧餉當派參將趙鴻舉等帶勇一千餘名紮營河西以資援應該逆自八月初七八至十四五等日屢次攻圍河東各營愈集愈衆馬隊尤爲兇悍經盧又熊等督勇堅守擊斃多賊十六日臣復親至獨山策應幸皆獲勝二十一日該逆馬步七八千人直撲浮橋參將張得勝首先衝擊連殺十餘人猝被礮傷臣慮士卒氣

餒暫令收隊二十二日該逆以河東各營未能
攻破遂自河西併力來衝並以二三千人繞從
盧又熊營後直撲浮橋與我軍接陣而騎賊千
餘人步賊三四千人潛於下游涉水而過趙鴻
舉等前後受敵且戰且走臣帶領守備陳貴等
馳往接應將賊擊退暫令各營駐紮獨山河東
賊匪乘勢圍攻盧又熊營復以數千人死踞浮

橋以拒我兵二十三日臣帶隊分兩路迎擊趙
鴻舉由破塘埂一路出隊殺賊多名臣領親軍
行至婆婆衝地方適遇賊匪分股而來卽飭都
司唐瑞廷等截擊殺賊十餘名該逆竄至仙人
洞臣復派都司陳炳南抄擊其後殺賊多名惟
念河東各營被圍糧斷亟宜設法救援因於是
夜密令同知袁懷忠帶領奮勇二百名由兩河

口渡河赴青山埋伏並派府經歷高堃千總高全勝等選帶奮勇四百人由下游仙人洞偷渡而以趙鴻舉等攻賊中堅一面密約盧又熊內外夾擊三更後該遊擊得信卽時衝出奮力接戰盧又熊等乘勢殺出重圍隊伍齊駐河邊帳棚槍械無所損失趙鴻舉等遂督勇力攻河西之賊把總唐萬清直撲浮橋該逆抵死相爭適

盧又熊自上游渡河與袁懷忠分兩路沿河抄擊該逆紛紛潰走我軍三路會合殺賊一千餘名落水淹斃者不計其數餘賊燒斷浮橋竄入各村我軍亦卽收隊查盧又熊等以千餘人抵禦兩旬之久每能以少勝衆轉敗爲功本擬卽將河西各營渡河進剿惟臣軍究祇六千餘人而賊多數倍騎賊尤衆萬一孤軍失挫必致大

局有妨臣是以暫紮獨山扼險以守二十六日賊復竄至仙人洞經袁懷忠盧又能馳往追擊生擒僞軍帥張汶元僞司馬周洪濤二名斬獲餘賊一百餘名連日探得舒桐賊匪欲圖分竄霍山並聲言欲由沙邱突竄河南固始臣以孤軍僻在西南隅實難兼顧當飭署霍山縣周宗文調集團練會同臣所派弁勇五百名防堵青

山一路並飛咨三品卿銜王庭蘭會同固始縣知縣張曜出境防勦前奉

諭飭英桂勝保袁甲三等會商撥兵助勦一俟助勦兵到臣卽當前進不敢刻延第該逆每以馬隊衝我步軍臣所部旣衆寡殊形又馬步異勢深恐難於得手臣所調容照馬隊已准咨覆先期派往他處臣復稟請勝保英桂就近抽撥馬隊三

二百名亦未知能否前來因思臣前在湖北與副都統巴揚阿共事最久知其勇略冠人所帶馬隊最爲得力今湖北業已肅清將軍都興阿足可統馭全軍合無仰懇

天恩飭下巴揚阿酌帶馬隊二百名步隊三百名前赴
臣營助勦伏候

聖訓施行至此次勦賊出力之同知袁懷忠等擬請懇

恩先行獎敘以勵戎行奏入

上命軍機大臣傳諭官文都興阿胡林翼李孟羣曰本日據李孟羣奏匪衆圍攻營盤請兵協助一摺該逆每以馬賊衝突我軍自應添調馬隊以資攻勦湖北現在肅清兵力尙可分調該藩司奏稱副都統巴揚阿所帶馬隊最爲得力請飭酌帶馬隊二百名步隊三百名前赴該營著官文都興阿胡林翼酌量抽撥

卽派巴揚阿管帶前往幫同李孟羣合力進攻毋稍
遲緩至勝保前派參將賽沙布等帶兵一千一百名
駐紮河口集以爲李孟羣聲援此項官軍自應移營
前進與李孟羣會合該藩司現在紮營獨山先就現
有兵力妥爲布置一俟湖北馬隊到營或與勝保等
所派之兵聲勢聯絡卽可相機進攻爲克復六安之
計

上諭內閣曰此次六安勦匪我軍以少勝衆實屬奮勇
所有尤爲出力之同知袁懷忠著以知府留於安徽
補用都司唐瑞廷著賞加遊擊銜守備陳貴著賞加
都司銜把總唐萬清著以守備拔補劉兆祥著以千
總拔補並賞加守備銜勇目沈士成萬重宣均著以
把總拔補

十四日

壬辰

耆齡奏言據署贛州府知府楊豫成

等稟報土匪蕭沅沸乘代理定南廳姚世恩赴鄉於六年十一月初二日襲陷廳城把總歐陽釗帶兵堵剿身受多傷姚世恩聞信會同橫岡營都司吉勒通阿帶兵回剿殺賊百餘人生擒三十餘名於七年二月十八日將廳城克復並攻剿下歷賊巢斬僞軍師凌紹洸殲斃賊夥多人三十日姚世恩督帶鄉勇往勦天花寺之賊

逆衆萬餘分路包抄我軍敗潰姚世恩手刃數
賊當時陣亡經楊豫成稟商鎮道調派署龍南
縣知縣馬修良等帶勇往勦賊聞援兵大至於
四月二十七日越嶺逃遁馬修良等追獲賊首
謝三滿等十一名五月十一日粵匪二千餘人
復擾定南賓岡村亦經馬修良等擊退境內肅
清長甯逆匪於六年八月勾通土匪分擾坪上

等處經署知縣張仁法會督兵勇殺賊三百餘人五月十九日福建武平股匪竄近安遠邊界張仁法復赴羅塘迎擊殲擒三四百人餘匪遠遁會昌縣於七年四月有瑞金大股逆匪五月復有福建汀州逆匪竄撲縣城均經知縣劉松屏擊敗福建武平縣之賊復分路來犯劉松屏督勇出戰殺賊甚夥餘賊向瑞金遁去興國縣

地方於七年四月賊匪攻撲縣屬高崔隘口知縣潘安帶兵迎擊殺賊數十名該逆敗後旋分擾牛扼崔孝墟等處亦經擊退旋探聞賊匪麕聚大壩地方我軍進剿斬馘七十餘級將賊巢焚燬賊又竄擾落坳等隘職員曾紀忠追賊過猛遇伏被害迨武進士韓進春等趕至賊卽遠遁雋都縣地方自甯都失陷後經署知縣潘毓

瑞帶勇進攻殺賊三百數十人七年三月信豐
賊匪數千竄至零都牛嶺等處潘毓瑞節節防
勦殺賊數百人復經該鎮道添撥守備陳德明
等帶潮勇千餘名赴援興國縣武進士韓進春
亦率勇往助四月二十二三等日分路出勦斃
賊無算五月間甯都逆匪屢次來犯俱爲鄉團
擊退查贛州府屬與閩粵接壤素爲匪徒出沒

之所自六年春間吉安失守贛郡被圍粵匪乘
時闖入勾結爲害該地方文武員弁咸能竭力
籌畫將各股竄匪次第驅除全郡肅清在事官
紳兵勇洵屬同仇敵愾可否由臣酌保以資鼓
勵出自

聖主鴻施代理定南驛同知贛州府經歷姚世恩屢次
防勦出力茲因進勦天花寺股匪陣亡殊堪憫

惻應請

飭部照知縣例從優議卹定南縣汛把總歐陽釗雖因寡不敵衆失守城池旋即隨同克復究屬防守不力應請革職留任以觀後效奏入

上諭內閣曰江西贛州府屬各廳縣於咸豐六年春間被粵匪闖入勾結土匪分擾定南等廳縣經該地方文武員弁督同紳民團練防勦將各股竄匪次第殲

除全郡一律肅清所有在事出力官紳兵勇均屬著有微勞著該撫查明酌量保奏候朕施恩其陣亡之代理定南廳同知贛州府經歷姚世恩著照知縣例從優議卹定南廳汛把總歐陽釗失守城池旋卽隨同克復究屬防守不力著革職留任以觀後效

耆齡又奏言本年七月撫郡賊匪擾及進賢李定太帶領兵勇一千餘名前往勦辦以人數稍

單未能深入幸瑞州府城於七月十三日克復
抽撥衡勇同字營虎字營及道員吳坤修之彪
勇共二千一百餘名前往進賢與李定太原帶
兵勇合成四千餘名又副將周鳳山所帶兵勇
二千名將豐城境內賊匪肅清進屯杜家圍扼
賊來路臣現飭知府李新華帶領建武勇二千
名前往杜家圍會合亦得四千人即可與李定

太進賢之師分路先勦撫州旁邑再行合圍郡城此籌攻撫郡之情形也副將普承堯所帶寶勇及元字雄字得勝營共四千數百名本擬飭令先勦新淦取道圍攻建昌現因吉郡賊匪分股屯聚吉水縣屬之阜田地方撫郡賊匪亦上竄吉水與吉郡股匪合併以致阜田賊勢頓張關入峽江境內不得不先其所急飛調普承堯

迎勦並令劉騰鶴等統率湘後等營自新喻進
攻阜田仍與普承堯夾擊賊巢普承堯俟峽江
阜田匪徒撲滅折赴新淦勦辦再由崇仁宜黃
金谿隨勦隨進圖攻建昌府城如李定太等攻
勦撫州之師尙有不敷則普承堯一軍或先撫
後建臨時相機而行仍由福興督率調度一面
咨會王懿德撥兵協助此籌攻建郡之情形也

吉安之吉和長三營由楓田洋口一帶步步爲
營漸近廬陵並在固江路口兩次勦賊獲勝惟
以兵力尙單未能直逼郡城八月初五日探聞
阜田賊衆分掠鄉村各營往勦先勝後挫自應
卽飭劉騰鶴等勦滅阜田賊匪後徑赴吉郡會
攻郡城前調贛州援師現據贛南鎮道咨稟已
選派勁勇二千名交副將遮克敦布統帶起程

兵數將及萬人軍聲可期復振惟是勇數驟增
餉項亟須籌畫吉安府知府黃冕患病請假經
臣飛調現署南康縣事候補知府周汝鈞馳赴
安福督辦勸捐接濟軍糧此籌攻吉郡之情形
也再瑞州一郡雖已肅清但近接臨江仍應嚴
爲之備酌留清江奇兵兩營練勇一千名駐守
郡城卽交現署知府銘彝統帶以資堵禦奏入

報

十六日甲午福興奏言查東鄉縣在撫郡之北該

逆踞爲門戶現在金谿一路旣限於兵力未能
直前亟應先攻東鄉由西路擣進臣檄令李定
太進賢一軍卽由此路進兵以扼其吭該總兵
已紮距東鄉二十里之來岡地方於勦守事宜

較爲切近其瀘溪所屬之高阜一帶逆匪窟踞
後屢圖撲擾貴溪上犯廣信臣飭李元度前往
截勦八月二十二日營官屈蟠等與團總軍功
凜生姚步潮分路齊進直抵高阜賊巢轟斃百
餘賊忽另股悍匪千餘用木箠渡過西岸抄我
後路哨官易允成等從山頂壓下殺賊百餘名
其時四山之賊約四五千悉銳來衝哨官單恩

謙先鋒唐玉成等乘勢由右路上山立斃執大旗悍賊十數名而右營哨官向平階等已從左路衝進各弁勇遂率大隊縱馬由中路齊進賊遂驚潰衆軍追殺僞官九名餘賊一千數百名二十四五等日金谿逆匪又復竄至陽田孔坊一帶亦經李元度協同該處原駐防軍合力堵剿該逆於二十八日糾合大股來撲我軍整隊

聞

抵禦敵彘矛刺斃賊目數名羣匪百餘賊仍遁
回孔坊臣惟有隨時嚴飭各軍堵剿毋任竄擾
奏入報

十八日

丙申

福興奏言據李定太報稱三路分進

之兵會集東鄉大橋地方探聞城內逆匪悉用
輓石砌城意圖死守李定太遂冒雨督兵直抵

城下另派得力弁兵於平塘地方多燃草火以
杜撫郡賊援一面派撥都司周友勝守備劉長
培陳新國子監典簿陳徽言等分攻四門令都
司季超羣等分投接應李定太自統親兵斷後
該逆見官軍勢將合圍隨即棄城而逃奔往金
谿許灣一路因平塘地方火燄甚烈知有官軍
截阻未敢遁入撫州我軍當將東鄉縣城收復

並追殺悍賊數十名生擒十餘名奪獲旗幟鳥槍火藥鉛彈等件臣查東鄉旣經收復自宜乘勝進勦金幣現已飛檄李定太迅卽移營以圖規取撫郡至隨營之西安潮黃等項兵勇派勦新竄萬年一帶賊匪雖經獲勝該逆又由景鎮續到一股與前股歸併人數衆多勢極猖獗現飭李元度就近調撥兵勇會合李定太夾擊金

緒奏八

上諭內閣曰東鄉縣城收復著福興卽飭李定太乘勝
追勦金谿以孤撫州賊勢其新竄萬年等處股匪著
該將軍督率兵勇迅籌堵勦毋任蔓延

十九日

丁酉

官文都興阿奏言查楚北軍營馬隊

節次遣撤外僅存一千餘名自德安下勦攻克
武漢進駐黃州功績之偉首推馬隊實爲必不

可少之勁旅而吉林黑龍江邊防緊要未敢遽
請添調不得已飛咨陝西撫臣曾望顏代購馬
五百匹解楚備用茲克復小池口要地仍須分
軍駐守其會攻九江進勦宿太以及留防襄陽
實屬不敷分撥臣等再四思維楚北軍威丕振
馬隊之力居多合無籲懇

天恩飭下吉林黑龍江等省選撥馬隊數百名並挑撥

西丹三四百名分起來楚實於東南軍務大有裨益再馬隊之得力首在管領之得人如蒙

俞允酌撥馬隊官兵臣都興阿查有膽技素優之協領

察隆額等三十五員可期得力謹開列員名恭呈

御覽伏候

聖裁奏入

上命軍機大臣傳諭官文都興阿曰本年夏間通諭各路軍營將吉林黑龍江馬隊分別撤留原以該二處調出之兵爲數較多本省未免空虛今官文等復請添調雖爲征勦得力起見而吉林黑龍江根本重地亦不可不籌兼顧本日已諭知景瀛奕山酌量各調西丹二三百名實於無可調撥之中勉爲抽派此項西丹恐亦須加以訓練方能得力因思荊州駐防旗

兵當較綠營兵丁爲得力都興阿熟悉馬隊訓練自必有方若能於駐防兵內挑選精壯令其隨同現有馬隊練習技藝亦可以成勁旅著官文都興阿知會綿洵挑選訓練令其隨同征勦以省徵調之煩其單開各員已諭知奕山酌派數員帶領西丹前往

上又命軍機大臣傳諭景瀆奕山曰官文都興阿奏請續調吉林黑龍江馬隊及西丹各數百名並開單請

派帶隊各員等語吉林等處馬隊調出過多餘應留
備本省操防未便再行調撥惟官文等所請挑選西
丹三四百名赴楚係爲挑補馬隊缺額起見著景瀛
奕山於該省西丹內各挑選二三百名派往湖北軍
營至官文等所開協領察隆額等三十五員據稱膽
技兼優自係黑龍江等城得力之員亦未便全行派
往著奕山於單開各員內酌撥數員卽令管帶西丹

前赴湖北其吉林派出之西丹並著景瀆揀派得力將領管帶前往俾資攻勦

二十一日己亥和春奏言鎮江逆匪自我兵在高

資地方連營三十餘座城賊驚懼時思分突八月二十五二十七二十八等日由東南北三門分股竄撲官軍營盤疊經各營將弁奮力迎勦斬馘極多而逆蹤仍時出游弋其意總欲分我

西路兵力突圍外竄查西面近城之處金山夾江賊營與我沙洲台勇營盤最爲逼近該逆於八月二十八日約出兩千餘人攻我台勇兩營副將王浚等督兵繞出賊後擊斃三十餘名二十九日該逆又駕小船登岸拋擲火罐副將朱承先督兵堵禦而陸路賊匪約二三千復從城西竄至王浚派都司鄒占魁等分路抄擊轟倒

執大黃旗賊三人斃賊約數十人該逆潰敗又
西三十里爲高資大營此處壁壘相屬近又開
掘長濠由西至東三十餘里張國樑督率各營
分兵護工該逆恐阻其出路日率醜類來攻莫
不懲創而去金陵逆首得鎮城告急僞文遂於
八月二十二三四等日糾衆萬人蟻聚七星觀
倉頭一帶圖攻高資臣等密派副將張玉良周

天培馮子材等分路迎敵沿途設伏別遣遊擊朱景山帶勇誘賊遇於下蜀街之東該逆蠡擁前來朱景山退走誘至炭渚張玉良大隊繼至奮力直衝擊斃逆黨四五百名二十七日賊在高山廟東門橋趙家灣一帶築壘六座欲通鎮江之路臣等密派張玉良等分三路進兵於二十八日出隊該匪分股迎戰我兵燒燬釣魚臺

賊卡破其咽喉遂分三路前進賊勢不支張玉良遂將高山廟賊營攻破周天培將東門橋攻破馮子材將趙家灣攻破斬馘無數總兵明安泰在句容聞信卽飭副將虎坤元等前來會剿該逆正在築營虎坤元令參將馬德昭等伏於田埂並令遊擊劉萬德等帶勇誘敵該逆競進迫入伏中槍斃甚多副將陶茂森遊擊韓廷貴

兩路包抄立破賊營數座陶茂森韓廷貴亦連
破左右兩營賊衆奔竄退至三汊河我軍跟蹤
追躡斬馘淹死之賊約三千有奇奪獲刀矛旗
幟擡槍鳥槍不可數計生擒三百餘名資遣脅
從二百五十餘名又據知縣溫紹原稟稱金陵
觀音門外賊船數十隻於九月初二日下竄經
水師參將黃彬兵船擊回是該逆之援鎮城陸

路難通必趨水路夾口難達必奔大江臣現於
焦山師船南北兩營各調五隻一面咨商德興
阿一面札知總兵泊承陞陳世忠迅速上駁合
力進攻以期迅復堅城奏入

上諭內閣曰此次鎮江連獲勝仗擊退賊援該逆坐困
危城勢難久踞著和春等督飭各路水陸鎮將併力
圍攻迅圖克復以慰殷盼

和春又奏言鎮江逆匪被剿緊急勢漸窮蹙惟探聞金陵賊黨現又搬運米糧二十餘船欲從水路下竄接濟臣等隨飭水師總兵陳世忠泊承陞趕緊各撥師船五隻駛赴高資會同賴鎮海合力防堵以杜偷越茲據陳世忠稟稱該總兵所帶師船或分防沙頭丹徒等處或派往下巡尙有篷索破爛船身虧朽者非修理不能出

仗若再抽撥萬一賊窮思竄深慮顧此失彼俟
輪修各船工竣再行撥赴高資其總兵泊承隆
雖經派撥三隻迄今數日尙未駛至防所臣查
鎮江陸路現正合圍而高資江口師船過少誠
恐該逆乘隙偷越不能再行添調俾資周密
臣又接准德興阿來咨亦以嚴堵上游接濟爲
重業經一體飭遵乃該總兵等一則意在展緩

一則撥不及數又不趕緊上駛殊屬玩延當此軍務喫緊之時未便稍事姑容應請

旨將浙江黃巖鎮總兵陳世忠革職仍留水營督勦江南狼山鎮總兵泊承陞摘去頂戴仍責令星速分別添撥剋日馳赴高資嚴密堵禦儘再藉詞推延卽行嚴叅治罪奏入

上諭內閣曰浙江黃巖鎮總兵陳世忠江南狼山鎮總

兵泊承陞統帶舟師攻勦沿江賊匪經和春派撥師
船駛赴高資會勦陳世忠竟敢藉詞推諉泊承陞僅
止撥船三隻又不能催令上駛均屬任意疲玩陳世
忠著卽革職仍留水營督勦以觀後效泊承陞著摘
去頂戴仍責令趕緊添撥以資堵禦儘再藉詞延誤
卽著嚴叅治罪

二十六日

甲辰

會國藩奏言

臣

初奉暫准守制之

旨因軍勢未定恐有

後命是以未敢遽行覆奏自七月以來聞龍泉克復吉安挫失之信又聞克復瑞州進賢等城之信頃又聞九江一軍攻克黃梅縣及小池口之信仰託

聖主威福江西軍務辦理得手

諭旨飭令如有緩急卽行赴營之處揆度時勢自可無

庸前往茲復欽奉

諭旨飭臣在湖南本籍辦理團防力圖報稱

聖主使臣以禮因時制宜跪聆之下感悚曷勝目下全楚肅清臣當仍遵

前旨暫行守制如果賊氛不靖湖南告警所有應須團練籌防之處屆時商之湖南撫臣再行奏明辦理臣自到籍以來日夕惶悚不安自問本非有

爲之才所處又非得爲之地欲守制則無以報
九重之鴻恩欲奪情則無以謝萬世之清議惟盼各路
軍事日有起色仰紆

宵旰之憂卽臣恪守禮廬寸衷亦得稍安奏入

上諭曰江西軍務漸有起色卽楚南亦就肅清汝可暫
守禮廬仍應候旨大臣出處以國事爲重抒忠卽以
全孝所云懼清議之訾猶覺過於拘執也

二十九日

丁未

駱秉章奏言撫州賊首僞國宗石

逆糾吉水新淦諸賊竄聚吉水縣屬之阜田地
當衝要爲臨江袁州吉安瑞州四郡所必爭臣

飛飭都司楊虎臣帶所部潮勇進扼新喻縣城
適卽選同知王勳行抵安福臣卽令其會同張
運蘭王開化等分軍留駐安福而自率所部趨
分宜與駐新喻之楊虎臣及劉長佑蕭啟江續

派之知縣劉嶽昭等相爲犄角以固袁州門戶而壯臨江大營聲援八月二十一日賊悉衆數萬來攻爲普承堯部勇擊敗二十二日普承堯親率後隊繼至正相地築壘賊列陣羅坊對岸遙擁而進普承堯率勇力戰當將各路之賊擊退忽賊馬數百回撲步賊亦回旗轉戰各軍力不能支全行敗退營盤盡陷賊遂大肆屠擄袁

州臨江民情震懼劉長佑念匪勢甚偏餉道將梗惟有分軍先剿援賊掩其不備盡力一戰或可轉危爲安二十至二十四二十五等日留隊三成固守臨江長濠並咨照劉于瀆派勇助守親率七成隊嚴陣於秧田中亭一帶截賊來路二十五日晡間援賊數萬悉竄太平墟欲來撲營其時臨城賊衆亦於福壽門填濠拔椿以待

劉長佑以事機愈急傳令出隊江忠義等由中路鄧在富等由右路漆盛年等由左路王高來等沿河岸進發黃開先率水師戰船護之劉長佑自率親兵四路策應天明行抵距太平墟五里地方值蕭啟江及參將田興恕等由右路至因督同進剿賊聞官軍驟至卽出布陣是時風起塵飛天色慘黯劉長佑令各軍整隊勿動逆

賊排開槍礮子如雨驟官軍屹立如故少頃鼓
角齊鳴官軍張兩翼並進衝入賊陣無不以一
當十賊衆披靡官軍乘勢蹙之立踏賊營六座
賊旋以馬隊來衝劉長佑令槍礮隊分左右斜
轟馬多擊斃餘皆反奔賊遂大潰官軍追至大
平市口賊復卓旗轉戰鄭其華盧秀峯繞由街
後擊之賊復敗走將賊營一律踏毀追近黃岡

地方始收隊回營是役破賊營四十七座約斃賊三四千生擒三百二十餘名奪獲大銅礮五尊擡槍二百六十桿鳥槍五百七十二桿大小旗幟二千五百餘件賊夜遁羅坊王勳張運蘭王開化等於二十五六等日先後馳抵新喻縣城聞賊竄太平墟卽於二十七日會同楊虎臣崔大光劉嶽昭各率所部進勦行至濠湖洲地

方賊一擁而出王勳等率勇直前陣斬六百餘名追至羅坊連踏沿河賊營十餘座賊泅水過河官軍乘之槍擊矛戳斃賊無數王勳等仍揮令各軍回駐河岸以劈山礮擊之紛紛倒斃餘賊由陂上一帶回竄阜田計共斃賊千餘臣維臨江踞賊被官兵攻圍窮蹙潛約賊援竄擾臨江大營後路冀解城圍兼思乘虛伺隙復陷袁

瑞兩郡其計甚狡當峽江被擾羅坊軍潰之時
賊氛偏近人情洶洶劉長佑於奇險之中出以
鎮定卒能掃除劇寇轉危爲安其志慮忠純實
爲可取現在城賊屢敗其勢斷難久支臣已飭
張運蘭王開化等率所部湘勇全軍由新喻速
進並飭接帶湘後營劉騰鶴由羅坊速進相機
會勦節節肅清俾臨江大營可無他慮此次出

力文武員弁兵勇可否仰懇

天恩准臣保奏出自

鴻施

駱秉章又奏言據知府張運蘭王開化都司楊
虎臣等稟稱九月初七日軍進白沙探報石逆
敗竄阜田復又分股回竄劉田上坳各處張運
蘭等以峽江縣屬橋步灘當阜田之衝遂於初

八日拔營前進行至獅子山甫欲安營遙見營南廟前一帶賊衆蟻集約八九千人營西有賊一股已至橋頭約六七千人張運蘭等分軍禦之西路賊先至官軍連開劈山礮轟斃悍賊十餘名賊卽敗走官軍從後掩擊共斃賊七百餘名南路賊覘知西路賊已敗遂亦逸去初九日南路賊復傾巢而來張運蘭王開化潛分所部

爲六隊嚴陣以待賊倏進倏退官軍屹立不動
未刻中營鳴鼓爲號分馳疾進截賊爲數段奮
威衝殺燒其沿途棚廠追至桐下賊復踞所築
四大壘開槍抗拒張運蘭王開化卽選從九品
楊安臣各督所部四面蹙之賊向南奔潰官軍
乘勢破其四壘斃賊數百賊委棄輜重米糧山
積張運蘭等下令焚之又追賊至田心地方始

收隊歸伍是日共斃賊一千三百餘名生擒賊
一百三十二名官軍無一傷者據生賊供僞國
宗石逆現踞阜田嗾僞指揮胡姓陳姓僞將軍
周姓岑姓率黨窺分宜新喻兩縣以圖袁州府
城而解臨江之圍不料官軍先到勢不得逞臣
維臨江一郡居江西西路之中地當水陸衝途
最爲緊要逆首石達開之竄江西先陷此郡布

置已定始陷吉安而趨撫建逆賊旣以此爲老
巢各渠目悉力援救自在意中頃接探報逆首
石達開率逆黨數萬自安慶渡江竄踞建德若
由建德竄浮梁趨饒州則與撫建之賊合吉安
臨江賊燄必張應請

飭下福興嚴扼該省東路勿令竄越庶西路得以次第
整理臨江一下兵力更厚自可收節節肅清之

效奏八

上命軍機大臣傳諭福興耆齡曰本月十四日據耆齡奏報阜田賊匪圖援臨江調集兵勇由峽江新喻分路迎剿此次略秉章奏劉長佑等大獲勝仗轉危爲安臨江當可得手惟據稱探聞逆首石達開率黨數萬自安慶渡江竄踞建德儻自浮梁趨饒州與撫建賊合則上游賊勢復張請飭福興嚴扼東路勿令竄

越等語福興現已進軍弋陽擬由東鄉一帶進攻撫
州自必籌及饒州後路俾建德之賊不能與撫建會
合勦辦方有把握李定太一軍現由進賢進勦東岡
李元度一軍現由貴溪進勦高阜著福興就近督飭
速籌兼顧惟兵力尙恐不敷前據耆齡奏派吳坤修
赴進賢與李定太之軍合成四千餘名又派李新華
赴杜家園與周鳳山之軍合成四千餘名均分路進

勦撫州普承堯一軍四千餘名俟阜田蕪事後卽赴撫建均由福興督率調度以上兵勇諒已先後拔營現在東路情形喫重著者齡卽飭帶兵各員迅速分路前進並著福興相機布置嚴防該逆來犯至福興請調廣東官兵昨據葉名琛奏報已派總兵壽山帶兵二千名由汀州一路前進此項官兵如抵江西福興一軍兵力稍厚卽當會合速克撫建並嚴扼廣饒

門戶毋誤事機

上諭內閣曰此次劉長佑等攻剿臨江援賊疊獲大勝
尙爲得手著卽督飭帶兵文武各員會合江西兵勇
認真搜勦迅克臨江府城毋稍延緩所有此次出力
文武員弁兵勇著略秉章查明擇尤保奏